

SECONDA SESSIONE URDINARIA DI U 2022
RIUNIONE DI I 27 E 28 D'APRILE DI
2023

2EME SESSION EXTRAORDINAIRE DE 2022
REUNION DES 27 ET 28 AVRIL 2023

2023 / 01/034

**REPONSE DE MONSIEUR LE PRESIDENT DU CONSEIL EXECUTIF A LA QUESTION DEPOSEE
PAR MADAME VERONIQUE PIETRI AU NOM DU GROUPE CORE IN FRONTE**

Objet : Un annu dopu, à chi ne simu di u travaddu di u Cumitatu Corsu-Sardu nant' à a quistioni di i basi è esercizi militari in Corsica è in Sardegna.

Vi ringraziu, sceglieraghju u francese, u corsu piuttostu.

Per falla in furia, prima pè e nostre rilazione partendu da u generale à u particolare. E nostre rilazione glubale cù a Sardegna, hè vera, sò state suspese dipoi l'affare di u Covid.

Hè vera dinù chì puliticamente era più lindu è più faciule qualchì anni fà, ci era una vulintà pulitica, chì esiste sempre oghje, ma forse chì a situazione pulitica interna à a Sardegna ùn hà micca permessu di ristabilisce e nostre rilazione à u livellu chì ghjera u soiu nanzu à u Covid.

Ci vole à sapè dinù, forse a sapete, chì ci sò l'elezione regiunale in Sardegna da quì à a fine di l'annata, dunque sò digià sguasi in campagna, cù una situazione pulitica interna chì hè assai cumplessa è dunque diceraghju chì u governu sardu è l'assemblea sarda anu forse pocu tempu à cunsacrà à e nostre rilazione istituzionale, a rigretu, ma pensu chi a vulintà hè sempre scumpartuta è di tutta manera, ch'è no a volimu o nò, ci vole à guardà ver di a Sardegna è ci vole chì a Sardegna guardi ver di a Corsica, perchè, l'avemu detta, è ripetuta, simu duie isule surelle è dui populi fratelli.

Travagliemu di modu regulare incù u governu di u presidente Solinas, è a so aghjunta, per esempiu nantu à l'affari di i trasporti aerei è marittimi, sugetti di primura maiò, è travagliemu di manera più generale pè ristabilisce e nostre rilazione.

Per ciò chì tocca à u parlamentu corsosardu tuccherà à a Presidente di l'Assemblea di l'Assemblea di Corsica à vede cù u so omologu s'ellu ci hè una pussibilità di scuntracci prima di l'elezione, sarà difficile, è per contu meiu averaghju forse un incontru, sia in Corsica, sia in Sardegna, incù u Presidente Solinas è a so aghjunta.

Per l'affare di l'esercizii militari, tengu à ramintà chì ùn ci vole micca à cunfonde l'azione di i movimenti di l'associ, azione pulitiche è popolare, è a pusizione di l'istituzione. Per ciò chì tocca à l'istituzione, da ramintà dinù chì e rilazione internaziunale sò u core di a cumpetenza di i Stati è chì a nostra voce, ch'è no a volimu o micca, hè di pocu pesu quand'ellu si tratta di l'interessi geustrategichi à u livellu di l'Europa o à u livellu internaziunale di u mondu.

Cuntuemu di sicuru à prumove l'idea di u Mediterraniu, spaziu di cuuperazione è di sulidarità, di fratellanza, ind'una logica di pace è iss'idea a prumuvimu à traversu l'inseme di e nostre rilazione aurpee, mediterranee è internaziunale.

Per ciò chì tocca di manera più precisa à l'esercizii chì ci hè statu, ci vole à ramintà dinù chì sò exercizii di l'OTAN chì venenu à sustene l'aiutu puru militare à l'Ucraina. Ùn pudemu miocca attempu difende l'Ucraina è vene à criticà l'esercizii chì sò urganizati pè ramintà à a Russia ch'ella ùn pò micca fà n'importa chè à u livellu di u Dirittu internaziunale.

Al di là di què, eiu pensu chì u prublema di fondu pè a Sardegna, ramintemu chì sò 35000 ettari di a terra sarda cuncernati da 'sse impiantazione, è dinù chì ùn ci hè più presenza americana, sò solu e forze taliane chì sò presente nantu à u Territoriu sardu.

Per ciò chì tocca à a Corsica ci hè, hè vera, l'affare di a basa di Sulinzara, di Vintisari, chì ghjè un attrazzu impurtante assai pè a Francia è a so azione internaziunale, puru per raportu à l'Africa. Dunque l'emu digià detta è a ripetutu quì ; ci vole ch'è no parlimu cù a Sardegna di a nostra pusizione cumuna è ci vole ch'è no parlimu noi, à l'Assemblea di Corsica di e cunsequenze ch'è no tiremu pghje di a presenza di a basa militare di Vintisari. Si sà ch'ùn hè micca valorizata abbastanza pè a Corsica, pè a Cullettività chì ripresenta a Corsica, puru pè e cumune è i rughjoni cuncernati è sapete, l'avia detta, chì aghju ingagiatu un studiu per avè attempu i vantaghji è l'incunvinienti di 'ssa basa, ch'è no possimu avè, spergu, una pusizione scumpartuta è argumentata quand'ellu si tratterà di fà u bilanciu trà ciò ch'ella costa a Corsica à a Francia è ciò ch'ella pò purtà, ciò ch'ella pò ripresentà, cumpresa a presenza di 'ssa Basa militare.